

acuminatis laxioribus inæqualibus, involucro et pedunculo parcè et farinosè nec glandulosè pubescentibus.

CREPIS MUNGIERII Boiss. et Heldr. (Sect. *Eucrepis*.)

Cr. perennis, radicis præmorsæ fibris tenuibus cylindricis collo glabro, caulibus pluribus subaphyllis glabriusculis infernè bifurcis vel a basi pluries et dichotomè ramosis folia vix duplò superantibus, foliis teneris lætè virentibus sub lente parcè setulosis runcinato-pinnatipartitis sublyratis petiolatis segmentis lateralibus numerosis a superioribus oblongis angulatis retrorsis ad infima triangularia diminutis terminali tantum duplò majori a basi truncato-subcordatà breviter ovato obtuso integro, foliis caulinis squamiformibus, pedunculis longis parcè squamulosis supernè minutissimè et crispulè puberulis, calyculi squamis breviter lanceolatis acutis involucro triplò brevioribus, involucri minutè glanduloso-puberuli phyllis linearibus acutiusculis, ligulis intensè luteis concoloribus involucro duplò longioribus, acheniis subincurvis sub 15 striatis utrinquè subattenuatis pappo niveo citò deciduo brevioribus.

Crepis Reuteriana var. *minor* pl. Cret. Heldr. 1847.

Hab. in quercetis montis *Idæ* suprà *Vorisa* alt. 3000-4000'. (Heldr.) Folia 2-4 poll. longa segmento terminali 5-7 lin. longo cæteris minoribus, caules cum pedunculis 4-6 pollicares, capitula magnit. eorum *Cr. Sieberi* cui affinis est et a quâ caulibus pluribus a basi bifurcis sæpius 2 rariùs pleiocephalis infernè glabris nec setulosis, foliorum lobo terminali aliis vix majori, radicis collo glabro, calyculi squamis acutioribus, etc., sat differre videtur. Hanc erroneè primùm retuleramus ad speciem sequentem diversissimam caule elato ramoso, foliorum segmentis acutis, involucri phyllis demùm dorso induratis.

CREPIS REUTERIANA Boiss. (Sect. *Eucrepis*.)

Cr. perennis, radicis præmorsæ fibris tenuibus cylindricis collo glabro, caulibus erectis infernè glanduloso-hirtis cæterum glabriusculis paulò suprà basin dichotomè et strictè ramosis laxè corymboso-paniculatis, foliis ferè omnibus radicalibus plus minus præsertim ad costas pubescenti-glandulosis petiolatis runcinato-pinnatipartitis lyratis segmentis retrorsis oblongis vel triangularibus acutissimis integris terminali basi truncato triangulari aliis 2-3 plò majori, folio caulino uno al-

terove lineari integro, pedunculis elongatis glabris nudis, capitulis mediocribus, calyculi squamis triangulari-lanceolatis acutis albomarginatis involucro quadruplò brevioribus, involucri glabri phyllis angustè linearibus floriferis livescentibus angustè albomarginatis fructiferis dorso ad tertiam vel dimidiam partem usquè secùs nervum medium elevatum rotundato-carinatum spongiosè incrassatis, ligulis luteis concoloribus involucro sesquolongioribus, acheniis cylindricis rectis sub 15 striatis supernè vix attenuatis pappo niveo demùm deciduo eis paulò longiori coronatis.

Hab. in montanis dumosis Anatoliæ, *Smyrnæ* in montibus suprà *Siclar* (Boiss.), in fauce *Tsimboukkan* Pamphylia (Heldr.), in Antilibano circà *Rascheya* (Boiss.).

Folia 3-5 pollic. longa 6-8 lin. lata illa *Aposeridis foetida* quodammodò referentia, caulis 1-1 1/2 pedales, capitula magnit. ferè *Cr. Sieberi*. Huic et duabus præcedentibus affinis sed distinctissima foliis indumento viscidulo obsitis, segmentis omnibus acutis non dentatis, caulinis subnullis vel angustè linearibus, phyllis non ut in eis fructiferis immutatis sed secùs nervum medium ut in *Phæcasio* et *Cymboseride* spongioso-incrassatis.

Var. β . — Pedunculi supernè involucrique pubescenti-viscida.

Hab. in regione medià Hermonis suprà *Rascheya* et *Gebel Baruck Libani*. Legi Aug.

CREPIS SIBTHORPIANA Boiss. et Heldr. (Sect. *Eucrepis*.)

Cr. rhizomate nudo indurato ramoso cæspitoso, foliis ferè omnibus radicalibus breviter puberulis obtusiusculis rariùs acutis oblongo-lanceolatis dentatis vel runcinato-pinnatifidis segmentis triangularibus acutis retrorsis terminali paulò majori triangulari acuto, caulibus nanis puberulis striatis rigidis crassiusculis folia paulò superantibus supernè alternatim 2-4 cephalis ad pedunculorum insertionem infracto-flexuosis, pedunculis ferè horizontalibus crassis capitulo subbrevioribus basi foliolo lineari-setaceo suffultis, calyculi squamis adpressiusculis linearibus involucro albo tomentello triplò brevioribus, phyllis latiusculè elliptico-linearibus obtusiusculis secùs lineam mediam nigrescentibus margine albo-membranaceis, ligulis subtùs rubellis, acheniis sub 12 striatis cylindricis rectis basi et apice obsolete attenuatis pappo niveo eis æquilongo superatis.